



**Les Fleurs Des Vies Des Saints Et Des Festes De Toute  
L'Annee, Svivant L'Vsage Dv Calendrier Romain Reforme**

Augmentees des Saints & Bien-heureux Peres Iesuites, de Saint Charles  
Borromee, & de Sainte Françoise ; Avec le Mertyrologe Romain, pour  
tous les iours de l'Annee ...

**Ribadeneyra, Pedro de**

**Paris, 1631**

xvi La vie de sainte Eusemie vierge & mart.

---

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)

LA VIE DE SAINTE  
Eufemie, Vierge & Martyre.

Le martyre de la glorieuse vierge sainte Eufemie est escrit par Simeon Metaphraste, & rapporté par Surius au cinquiesme tome des vies des Saints, en ceste maniere. Sainte Eufemie estoit de la ville de Calcedoine, fille de Filofrone & Theodore, personnes nobles & riches: son pere estoit Senateur de la ville. Eufemie estoit douée de grandes vertus, d'une rare beauté, modeste & chaste. On fit vne feste tres-solemnelle au Dieu Mars en Calcedoine, à laquelle par le commandement de Prisce, Proconsul d'Aise, tous furent inuitez à s'y trouver, sur peine de la vie, pour adorer le Dieu Mars. La sainte Vierge Eufemie detestant ce prophane sacrilège & idolatrie de ses faux dieux, n'y voulut point aller, de peur de souiller son ame d'une chose si brutale & abominable: elle estoit si qualifiée, qu'aussi-tost les Prestres des faux Dieux la trouuerent à dire, & l'accuserent deuant le Proconsul, lequel la fit prendre, & tascha à luy persuader d'adorer les Dieux, si elle ne vouloit subir tous les plus horribles tourmens dont on martyrisoit les Chrestiens.

La sainte Vierge ne fit non plus de cas des remontrances, que des menaces du Proconsul: on la mit en prison, & à quelque iour de là on la fit comparoître publiquement en justice, où ayant esté trouuée constante en la confession de nostre Sauueur & Redempteur Iesus-Christ, le tyran la fit cruellement fouetter avec des verges de fer, & tirer ses membres delicats en la torture. On l'attacha à vne rouë pour luy briser les os, & la mettre en pieces: mais s'armant du signe de la croix, & de la confiance en son cher Espoux, elle le pria qu'il la secourust: ce qu'il fit, & la deliura de la rouë, & guarit toutes ses playes: de façon qu'elle parut plus belle & polie qu'auparauant; au grand estonnement des bourreaux qui la tourmentoient: on alluma vn fourneau plein de poix, de souffre, d'estoupes, & de fardement dans lequel deux des principaux Ministres du Proconsul, s'efforcans de la ietter, apperceurent des Anges qui estoient autour de la sainte Vierge pour la defendre: ce qui les contraindit de se retirer: Prisce commanda à deux autres nomez Cesar & Varie, d'executer sa volonté, dont s'estans mis en deuoir, le feu les deuora, la sainte Vierge demeurant sans aucune lesion dans le fourneau, à louer N. S. & Redempteur Iesus-Christ, & en sortit, sans qu'il se fust brulé vn seul filet de sa robbe. Le cruel tyran ne se contēta pas de ses tourmens, & ne recogneut le Createur & Seigneur, auquel toutes les creatures seruent & obeissent: au contraire plus endurcy & obstiné qu'auparauant, il la fit exposer à de nouveaux tourmens, & attacher de grosses pierres à ses pieds, & à ses mains, pour la demēbrer, apres qu'elle fut hors de ce tourment, il fit creuser vne grande fosse en façon de cisterne,

laquelle il remplit de poissons & coquillages de mer, puis la fit jeter dedans afin qu'ils la rōgeassent & despeçassent: neantmoins ils n'approcherent point d'elle, sinō pour la defendre & respecter. Le Proconsul qui imputoit ceste victoire & toutes les autres precedētes, à l'art Magique, la fit de nouveau grandement tourmēter, & travailler ses membres, & friter en des poiles de fer, qu'il tenoit preparées pour cela: on appōta les tenailles pour la pincer, mais le fer perdit sa force, & deuint plus mol que cire: le feu s'esteignit, & la sainte Vierge se trouua saine & entiere, sans aucune cicatrice, triomphante du feu, du fer, du tyran, & du diable qui la persecutoit par tant de moyens. En fin Prisce la presenta à quatre Lyons & trois Ours: elle qui desiroit se voir bien-tost avec son Espoux, le pria affectueusement: par ceste charité & toute puissance, qu'il luy auoit fait la grace de vaincre la fragilité de son corps, la fureur des demōs, le courroux du tyran, & triompher de tant de tourmēs, de recevoir son esprit, & permettre que ces bestes farouches n'eussent aucune pitié d'elle: nostre Seigneur exauça son oraison, & laissa approcher vn Ours, qui luy donna vn coup de dē, & puis se retira, sans toucher ny māger sa chair: les autres Ours, & les quatre Lyons estoient à l'entour d'elle qui luy lechoient les pieds. Alors que la sainte vierge trespassa, il survint vn grād tremblement de terre qui fit fuir le peuple tout esperdu: ce qui dōna moyen aux parens de sainte Eufemie, d'emporter son corps saint & de l'enterrer honorablement apres de la ville, iettant plusieurs larmes, non de tristesse, mais de ioye. Dieu fit de grands miracles par ceste siēne espouse, qui sont rapportez par Euagre. Quelques fois elle apparoissoit en songe à l'Euesque de Calcedoine, & luy cōmandoit de faire quelque feste solemnelle en l'Eglise, pour louer nostre Sauueur & redempteur Iesus-Christ, & recevoir son tres-saint corps: approchant vne espōge de son corps, il la retiroit si pleine de sang, qu'on en pouoit de partir aux bourgades & villes circonuoisines, les gouttes de sang demeurans entieres & perpetuelles, sans changer de forme ny de couleur: nostre Seigneur Iesus-Christ faisant ce miracle plus ou moins souuēt, selon les merites du Prelat qui preside en l'Eglise. L'Empereur Maurice ne pouuant croire ce miracle de la sainte, le voulut experimenter luy-mesme; si bien qu'il demeura tout confus, & ses mains pleines de sang: & cogneut combien Dieu est merueilleux en ses Saints, & le loita pour les grands miracles qu'il faisoit au corps de sainte Eufemie: outre qu'il sortit vne odeur si suauē de son cercueil, que l'ambre & les odeurs de la terre ne sont rien au prix.

Je ne veux passer sous silēce vn autre miracle bien plus signalé, que nostre Seigneur I. C. opera par l'intercession de sainte Eufemie, pour la confirmatiō de nostre sainte foy. On auoit fait dans l'Eglise de sainte Eufemie, du tēps du Pape S. Leon le Grand, & de l'Empereur Marcien, ce grand Cōcile de Calcedoine, composé de six

16. SEPT.  
 cens trente Euesques: auquel Dioscore & Eutiche avec leurs sectes furent condamnés: neantmoins le Concile estant acheué, comme les heretiques sont violens & rebelles à Dieu & à son Eglise, ils murmuroient & se moquoient des Decrets du S. Concile, disans, qu'ils n'estoient fondez en la verité Catholique, ains en l'autorité & puissance de l'Empereur. Pour raualler cet orgueil, & clore tout à fait la bouche aux heretiques, les Catholiques se cōfians en la misericorde de nostre Seigneur, & en la protection de sainte Eufemie: firent ceste passion avec eux: Que les Catholiques escriroient en vn papier la confession de leur foy, & les heretiques la leur en vn autre à part, & que ces deux papiers seroient mis dans la Chasse où estoit le corps de sainte Eufemie: & que le papier qu'elle approuveroit des deux, fust tenu pour veritable. Ceta fut ainsi cōuenu & executé: on leua la pierre qui estoit sur son tōbeau, & les deux papiers furent mis dans le sein de ceste noble Vierge & Martyre: le tombeau fut fermé & cacheté des deux parts: chacun se mit en oraison, suppliant nostre Seigneur Iesus-Christ de descouvrir la verité: au bout de trois iours la sepulture fut ouverte en la presence de l'Empereur, & le papier des heretiques se trouua sous les pieds de la Sainte, & celuy des Catholiques en sa main, laquelle sainte Eufemie estendit, bailla la confession Catholique à l'Empereur, & au Patriarche: aucuns heretiques voyans ce grand miracle, se conuertirent, les autres demurerent obstinez en leur perfidie. Tout cela est rapporté par Zonare & Glicias, & est aussi rapporté par Metaphraсте & Nicephore, encore qu'ils la racōtent diuersément. Le martyre de sainte Eufemie fut le 16. de Septembre, sous l'Empire de Diocletian. L'Eglise celebre sa feste le mesme iour: tous les Martyrologes font mention de sainte Eufemie, Metaphraсте & Laurens Surius.

### LA VIE DES SAINCTS

Lucie, & Geminian, Martyrs.



E mesme iour l'Eglise celebre le martyre des saints Lucie & Geminian, qui est rapporté par Adon en son Martyrologe, en ceste maniere. Sainte Lucie estoit vne tres-hōneste matrone, laquelle apres le decez de son mary, vescu saintement iusques en l'an 75. de son âge: elle auoit vn fils nommé Euorepe, fort vicieux & desbauché, & sur tout ennemy des Chrestiens: le diable eut tant de pouuoir sur ce miserable, que violāt toutes les obligations de la nature, il accusa sa mere d'estre Chrestienne deuant l'Empereur Diocletian, qui la fit mettre en prison où elle fut cōsolée de nostre Seigneur, le lendemain on l'emmena en Iusticé, & l'Emperer l'ayāt trouuée constante en la confessio de nostre Seigneur Iesus. Christ, la fit cruellement foietter. Il s'eleua soudain vn tourbillon de vent, & vn tremblement de terre, qui ruina le Temple de Iupi-

ter, & le reduisit en tel estat, qu'il n'y demeura pierre sur pierre en tout le bastimēt. Diocletian irrité de cela, fit apporter vne grande marmite de cuiure, laquelle fut remplie de poix & de plomb fondu, & fit jeter la sainte dedans, pour y estre boiillie, mais la vertu du Tout-puissant la cōserua tellemēt, qu'elle demeura trois iours dedans ceste marmite, benissant Dieu, comme si elle eust esté couchée en vn bon liēt: depuis on la piloria & promena ignominieusement par la ville chargée de fers & de plomb: passant deuant la porte d vn homme de qualité, nommé Geminian, où il y auoit vne grande quantité d'idoles, vn pigeon plus blāc que neige descēdit du ciel, & se posa sur la teste de Geminian, lequel estu par ce qu'il voyoit, & illuminé de la clarté celeste, se jeta aux pieds de la sainte pour luy demāder le Baptēme: lequel il receut par les mains d vn Prestre nommé Protas, qu vn Ange aduertit d'aller à la prison le baptiser. Diocletian renuoya Lucie & Geminian à vn cruel Iuge pour les faire tourmenter & despēcher: mais lors qu'ils estoient tourmentez & battus à coups de baston, la chambre où estoit le Iuge tomba & la tua. Vn autre Iuge, nommé Abolfrose, luy succeda, lequel excogita de nouueaux supplices, comme si les autres n'eussent esté que des jeux: cela fut cause de la cōuersion de 615. personnes: ses Saints, lesquels receurent tous ensemble la couronne du martyre: toutesfois le Iuge n'en vanta pas long-temps: car passant à cheual dessus vn pont: il tomba dans la riuiere & se noya, sans que l'on peust iamais trouuer son corps. En fin la bien-heureuse sainte Lucie & Geminian passerent par le fil de l'espée, par le commandement de Megalie, homme Consulair, le 16. de Septembre, l'an de nostre Seigneur 303. Leurs corps furent enleuez par vne sainte femme nommee Maxime, qui les enterra avec beaucoup de reuerence & de pieté.

### LA VIE DE SAINT

Janvier, Euesque & Martyr.



Ainēt Ianuier estoit Euesque de la ville de Beneuent, qui est au Royaume de Naples. Durant la persecutio de Diocletian & Maximin, vn saint Confesseur nommé Sofie, fut prins: & S. Ianuier l'allant visiter en la prison pour le cōsoler & exhorter au martyre, le President Timothee le fit amener deuant luy, s'efforçant de le peruertir & attirer par belles paroles, à l'adoration de ses Dieux: toutesfois apres auoir recogneu qu'il perdoit le tēps, il fit chauffer vn four trois iours durāt, puis fit jeter dedans S. Ianuier, que Dieu cōserua en sorte, qu'il ne receut aucun dommage, & s'en retira sans y auoir perdu vn poil de barbe, ny vn filer de ses habits: le tyran s'en eschauffa dauantage, voyant que le feu auoit pardonné à celuy qu'il vouloit perdre: il le fit si cruellement gehenner, qu'on luy disloqua tous les membres: il fut visité par Este Diacre, & Desiré